



Kamis, 28 April 2022
Ogen: Kuan-kuanen 17:24



Perayaken Kalak Pentar



Erbage-bage perayaken geluh manusia, lit kebayaken, kinijilen, pujin jelma sinterem, lit ka deba kesenangan ras keriahen. Labo dalih min kerina, sebab perayaken geluh mabai kegeluhenta ertorosen, teratur ningen kin. Kalak si nggeluh alu la lit perayakenna, biasana la lit disiplinna janah la beluh ngidah simehuli si jadi bas geluhna, piahna rusur turah cian atena nandangi kalak si deban si tersuksesen asa ia. Tapi kalak si terlalu berambisi, eme kalak si tajam kel perayaken geluhna pe, mawen kerassa man dirina jine bagepe man kalak si deban, seh maka nukah kel kecewa adi sura-surana la seh bagepe adi kalak sideban la bagi ukurna. Kalak si perayakenna bage cara siuagapa pe nalemkenna gelah seh sura-surana. Padahal kai pe bas doni enda labo lit si 100% njamini kemalemen ateta.

Sada buku tulisen pendeta Rick Warren nampati kita guna ngertiken ras nggeluh erpalasken perayaken geluh si payo sue ras Pustaka si Badia. Nina, kalak arus nggeluh erpalasken tujun si mabai geluhna. Tujun ntah perayaken geluh si man ikutenken e, labo perayaken siniban kita, tapi perayaken ntah pe tujun geluh siitepa Dibata man banta mulai kin kita bas bertin nandeta nari. Lit 5 erbage si iturikenna selaku perayaken geluh siarus si demi selaku kalak Kristen tupung kita nggeluh eme, ersembah man Tuhan, ersada ras teman sada kiniteken, dewasa erkiniteken, ngelai Tuhan ras erberita simeriah. Kalak si perayaken geluhna bage la banci lang, lanai lit waktuna sia-sia. Lanai lit waktuna membandingkan diri ras kalak sideban, piah dungna turah ate cian. Labo isurakenna hebaten ia asangkan kalak si deban, labo perikutna sura-sura si jahat mabai perbahanenna pe jahat gelah seh sura-surana. Emaka kalak si payo perayakenna malem nge atena, ternikmatisa geluhna ban Tuhan si negu lagu langkahna.